

58

S V E V I A S V P E R I O R ,

quæ olim

A L L E M A N N I A .



Suevia.

Vi Germaniæ Imperium in circulos dividerunt, hunc Sueviæ ordine quantum fecere. Sueviam olim regnum fuisse ex historiæ monumentis constat. Deinde in Ducatum redactum.

Hodie vero nemo

Germaniæ Principum Ducis Sueviæ titulo ornatur. Sub multis quippe Principibus divisa est. Pars domui Austriacæ jure hæreditario accessit. Dux Wirtenbergensis plurimam partem occupavit. Multæ in ea sunt civitates liberæ & Imperiales, multæ quæ Ducibus Baviaræ parent. Hujus gentis tanquam nobilissimæ & antiquissimæ in Germania nemo veterum scriptorum non meminit. Ad Albim & Suevum fluvium eam olim habitasse ex Ptolemæo, Strabone aliisque auctoribus liquet. Hodie Germaniæ suprema portio est, ad Alpium enim iuga pertingit. Dividitur in Superiorem & Inferiorem. Superiorem præfens tabula exhibet. Dicta fuit specialiter Allemannia, à lacu Lemanno, uti opinio est. Complectitur enim quicquid olim Rhæti Vindelicique possederunt. Ab Septentrione Danubio clauditur, ab Oriente Lyco fluvio, vulgo *der Lech*, à Meridie Alpibus Suevicis, ab Occidente Lacu Acronio, sive Brigantino aut Bodanico. Lacus hic amplissimus est, Sueviam ab Helvetia dirimens, longus sex septemve milliaria Germanica, latus duo circiter, at inter *Rosbach* & *Buchhorn* tria milliaria latitudine explet. Est autem Lacus hic duplex, Superior & Inferior. Superior à Lindavio incipit & ad arcem excurrit *Podmen*, unde lacum Podamicum dictum volunt, & corrupta nonnihil voce *Podmenzee*, unde post fluxerit, *Bodensee*. Aliis tamen libet *Bodensee* dici à profunditate & immensa altitudine. Inferius mare, quod à Costnitz principium capit, exiguum admodum est, & à Cella vicino pago *Cellersee* vocatur. Veteres Lacum Venerum appellarunt. Rhenus medium hunc lacum transit, exonerantque in eundem se aquæ plurimæ undequaque illabentes, quibus æstivo tempore lacus auctior fit solito, parem semper servans aquarum limpiditatem. Regio lacui circumjecta frugifera admodum est, pagis, arcibus, urbibusque in ripa conspicuis insignita. Quatuor inter eas Imperiales sunt: *Costnitz*, *Vberlingen*, *Lindau* & *Buchhorn*. Visitur hic urbs & Comitatus Bregentz, unde Lacui Brigantino nomen. *Lindovia* sive Lindavium, vulgo *Lindau*, oppidum Imperiale, situm in insula Acronii lacus, aquis undique & fluctibus circumdatum,

Germania.

nulla sui parte continentem tangens, nisi ubi lapideo ponte, qui ducentos nonaginta passus in longitudine habet, terræ annectitur. Locus est amœnus admodum & salubris, ventis quibusvis pervius, aquam fontanam, agrum circum fertilem, necnon omnia ad victum necessaria suppeditans. Edificiis adhuc splendidis ornatur, nulli non negotiatorum generi opportunus, natura validus, adversus inopinatas hostium incursiones tutus; in cujus Occidentiori, haud minor ambitus, adhuc magna vinearum copia colitur, & spatium illud mœnibus & fossa, duabusque tum portis, tum subliciis pontibus ab oppido discretum. Insulæ nomen ex antiquo etiam obtinet, in quo hodie piscatores solum naviumque architecti, & qui textrina vivunt, habitant. *Buchhorn* oppidum exiguum est, cui aliæ urbicula & pagi parent. Nomen habet à silva *Buchwaldt*, quæ hucusque se extendit. Huic ex adverso jacet *Arbon*, Latinis *Arbor felix*, ubi Romani castra posuerunt adversus Allemannos. Nec longe hinc abest oppidulum *Romishorn*, quæ se forma cornu terra in mare contorquet. *Vberlinga* circa fines maris Acronii jacet, vinis abundans, territorio superbiens amœnissimo & jurisdictione.

Buchhorn.

Vberlinga.

Algovia, quam proprie hæc Tabula exhibet, ab Oriente Lyco, à Septentrione Danubio, ab Occidente Lacu Podamico, à Meridie Alpibus circumscribitur. Regio est dura satis & horrida, populos habens rigidiori vitæ assuetos, colo & nendo victum queritantes, quod ne viris quidem dedecori est. Pecorum, vaccarum, equorum, abundans. Hordeum fert. Præcipuus quo rigatur fluvius est *Iler*, qui ex Alpibus ortus Kemptam præterlapsus tandem prope Ulmam se Danubio miscet. Etiam in eundem desinunt minores omnes, *Riß*, *Rott*, *Guntz*, *Carnlach*, *Mindel*, *Schmutter*, alique. In Lacum exeunt, fluvii *Ober-Arg* & *Vnder-Arg* dicti. Urbes Algoviæ sunt, nativis terræ vocabulis: *Imenstat*, *Kempten*, *Ysne*, *Wangen*, *Vettmang*, *Luttkirch*, *Ravensburg*, *Waldsee*, *Memmingen*, *Biberach*, *Wursach*, *Fussen*, *Mundelheim*, &c. Montium nomina sunt: *Ruchsteigh*, *Thenheim im Loch*, *der Grenten*, *Sach*, *der Pyler*, &c. Pars hujus regionis ad Duces Austriæ pertinet, pars Episcopo Augustæ Vindellicorum paret, necnon Abbati Kemptensi, & Comitibus Montfordiæ. Etiam Imperiales urbes aliquam sibi portionem vendicant. Non ita longe à lacu Brigantino sita est Imperialis urbs *Ravensburg*, ad fluvium Schuss, quasi dicas, *Gravensburg*, cui proxime adjacet arx à Duce quodam Sueviæ exstructa, nomine *S. Veits berch*; visitur hic cœnobium *Weingarten*; quod Guelphi Comites Altorfiæ condiderunt. Ad fluvium

Algovia.

Fluvius Iler.

Urbes.

Montes.

Ravensburg.

Spurch.